

四庫全書

集部

欽定四庫全書

集部

范德機詩集卷二

詳校官庶吉士

臣初爵齡

侍讀臣孫球覆勘

總校官編修

臣王燕緒

校對官助教

臣羅萬選

謄錄監生

臣李觀光

欽定四庫全書

集部五

范德機詩集

別集類四 元

提要

臣等謹案范德機詩集七卷元范梈撰梈字亨

父一字德機清江人以薦為左衛教授遷翰林編修官出為嶺海廉訪使照磨歷轉江西湖東後選充翰林應奉又改閩海道知事移疾歸天歷二年授湖南嶺北道廉訪使經歷

以母老未赴明年母喪竟以毀卒所著有燕
然稿東方稿豫章稿候官稿江夏稿百丈稿
凡十二卷此本七卷不知何人所併葉子奇
草木子載栲與危素同晚步得雨止修竹間
案諸本多訛間為
間今據原本改正流螢夜深至二句喜甚既
而曰語太幽殆類鬼作云云即今集中蒼山
感秋詩也其語清微妙遠為詩家所稱然栲
詩豪宕清道兼擅諸勝實不專此一格閩書

又載其為閩海道知事時以文繡局取良家
子為繡工作閩州歌述其事廉訪使遂奏革
其弊歌今亦載集中然其事可記其詩則語
頗近俗與沈作喆哀扇工歌僅相伯仲尤不
當以是槩槁也揭傒斯序其集曰虞伯生稱
德機如唐臨晉帖終未逼真改評之曰范德
機詩如秋空行雲晴雷卷雨縱橫變化出入
無朕又如空山道者辟穀學仙瘦骨崢嶸神

氣自若又如豪鷹掠野獨鶴叫羣四顧無人
一碧萬里云云侯斯之論雖務反虞集之評
未免形容過當然朽詩格實高其機杼亦多
自運未嘗規規刻畫古人固未可以唐臨晉
帖一語據為定論矣乾隆四十六年九月恭
校上

總纂官

臣

紀昀

臣

陸錫熊

臣

孫士毅

總

校

官

臣

陸

費

墀

欽定四庫全書

范德機詩集卷上

元 范梈 撰

五言古詩

送張鍊師歸武當山

張君瀛洲人來作武當客始來武當時祇著謝公屐弟
子百數輩稍稍來服役誅茅立萬柱空中現金碧辛苦
三十年夜卧不側席以之律鬼神故亦如短墨元年踰
冬旱朱火燒四國野谷方焦熬六月畿甸赤朝廷亦不

愛犧牲與圭璧僵巫豎憊史歌舞無消息君時待詔來
公卿初不識一朝傳天語問以濟旱策君云臣鄙愚造
化非所測陰陽有開閉此實智者責公卿復致辭物生
今孔棘已勅京兆尹取足輸粟帛此如解倒懸祀事惟
所擇君聞猶固讓心實內憂惕飛章白玉闕瀝膽殫悃
幅臣實才淺眇臣實學迂塞臣有一寸心願輔后皇德
后皇本愛民民今旱為厄或者罪有由皇亦重開釋祈
謝各有方呪禁各有式上堂薦明水下堂考金石夜分

請命既昧爽大施設為壇東市門經紀法靈冊庭中玄
武旗飄飄墨黍黑君臨一揮手怒髮上霄直指揮東方
龍卷水東海側指揮西方龍卷水畧西極北南暨中央
各以方率職某日某甲子漏下五十刻我在壇上伺不
得忤區畫豐隆與飛廉列缺與霹靂汝將汝風馳汝遣
汝雷擊汝雲馮勿漓汝雨必三尺汝不從誓言不畏上
帝勅至期果響答動蕩十日澤常時人所難君若不以
力公卿奏天子是必有褒錫可以寵號名可以蕃服楊

君曰天子聖卿從誠所格臣敢貪天功况在歸計迫昨
得山中書至自青溪宅向來百弟子遲歸在朝夕暇時
冬序半霜下木葉積明當課斬伐結構西岩壁山田晚
報熟芝朮及採摘獼猿長如人夜夜盜柿栗隄防苟不
豫六氣盡蝨賊公家事既已私事容棄擲方知用世士
遺世等糠粃所過如虛空焉知去留迹我持一瓢酒欲
以贈遠色歲暮不見君悵望空中翮

奉同元學士以落月滿屋梁猶疑照顏色為韻

賦贈鄧提舉之官江浙一首

青天青如石星辰何磊落適見北斗高忽復滯郊郭感
此流電驚行邁孰為樂况值杪春令清商動涼幕芳宴
候朋親驅車背河朔登高望四野下田畢新穫於時不
同賞惆悵睇雲岳古人有云然末契重交託託契自有
初相睇在結髮請持交龍鏡比似空際月昔月三五盈
今夜三五缺月盈自有時僕君采薇蕨采薇陟崇岡空
筐不易滿季女懷朝饑日下光纂纂豈無機杼思十旬

義一澣含淒就經緯意長絲緒短路逢相識親要入鮫
人館泣下仍成珠更苦哀歌緩緩歌浮雲停急歌流水
促水流亦有宗雲散復成族踽踽行路子離居振羣肅
會合寧無期載感時運速晨風懷苑林玄鳥辭華屋明
發念飛蓬秋聲浙江曲浙江名山水在昔最餘杭浩浩
海負區地絕川無梁執玉夸禹會帶甲宣吳疆慨彼仁
義都風俗殊興亡末代綴繁會周衢涕絲簧聞之虛廟
閼斷雨生蛩蛩幸及九域一四民樂時康游歷須慎重

勿用多殞傷矧茲握新命出布堯文章雖當日月遠足
昭雲漢光淒其金氣厲嘉實方斂藏楊柳卧枉浦蒹葭
委嚴霜物情各有歸我獨不得將仰視雲中鴈肅肅俱
南翔雲鴈鳴天中回首顧齊州沙嶼重繇互竟復少遲
留欲知鳴鴈心黍稻非終謀視彼羣飛者矢心良不猶
不猶將謂何豈復不如茲明年擇勝蹈既往無復疑譬
之駢蹄駒昂藏養雲姿下乘歲百駕逸足誠歸誰伯樂
偶並世當受知者知長鳴待儔侶首路復安之所之在

東南斷水列風嶠至人遺吏隱出處惠兼妙于莫居匣
中千年逸神耀一朝持入手未言心相照照之千里外
如在咫尺間明夜夢見君怡怡越河關惜去不須更念
來亦循環古時岐路人何用涕潸潸景岩草木斷虎豹
啼空山方冰先春水野飯維清灣買觴斫魚鮮甫謝金
鑾班此行竟遂媾亦慰親友顏天目掃煙岫日夕飛禽
還山中桂樹多庶為故人攀攀花貽遠道洵美道中軛
苦復無相忘報之雙白壁美人如芙蓉隔浦無相識舊

交日以違新交當日得各自有殷勤初不在容色俯水
愧游鱗仰空慚飛翼眷言執手地歲暮霜霰迫踟躕復
踟躕悽惻重悽惻

寄謝周文學

周子雅孝友聲價動江隅有德斯有言新詩敷道腴示
余以詠嘆累日不知劬雅亡風亦衰賴爾亦區區與子
初識面青春滿洪都別來二十年王事勞馳驅山澤念
耆舊風塵揚鬢鬚焉知離憂中乃得此長娛公園橘柚

寒驥鳴感修途發音詠隆施重見能來無

贈馮鍊師歸岳陽

王子吹笙侶精神如九秋暫攜碧山屐遨遊帝王州江
湖未識面寄語旋鳴騶夏雲逼幽澗春鳥啼芳洲行色
當及春景氣適惠柔眷眷將歸客勝日懷林丘何時謝
燕闕亦得西南游洞庭木葉下期爾岳陽樓

贈學正洙扶櫬歸真定

朔風吹急水哀鴈繞天鳴送子川路遠浩蕩扶神旂少

年挾高藝求仕入皇京祖父通籍家蟬聯及弟兄奈何
抱長痛鞠此霜霰情伯氏江外居心殫慈母驚奉命持
衰來留連鎮陽城會言褰袂事各復東西行生養死當
葬若為好爵嬰勗子泣血日寡言收視營尚愛千金軀
以保百代貞

次韻古體二首

偶為淳樸語即有希夷風在世能勿忤聊以古爲同大
巧三代人所拙辨偽工曲哉末學士妄擬述作功至性

苟能盡焉得推盛隆先師予狂狷蓋憤失所中於時得
依歸敢嘆吾道窮

聖道缺已久文不充其資自從夏殷來因革當從誰中
更鳴鳥聞載嘆德之衰寥寥大師樂復得存那猗大音
苟有託不必稽其辭設有盈樽酒日夕斟酌之樂杯當
在手自今不復疑胡為不復疑賢者當明知

和胡掾

三違江海春再見歲將夕開軒觴微風忽近載陽節鳥

鳴氣適和晨鵲亦稍集逮歡不猶今萬事已逾昔緬懷
命世士具為知所後翻知不賢名可足濟身策而我拙
自藏流動日月積遠觀良有餘仁者造其極播美明珠
篇時草當更碧

貽李述魯叟編修

悲風動日夜游子絕河山一別十年流四方幾時還憶
子旅江外過余撫林鬣曉色竹晻靄春容杏闌珊陽坡
鳴赤鷄陰館來白鷗文義相剖析宴歌亦循環吳星逐

夢變楚月帶愁彎
自來燕薊中相望漢沔間
初傳教下郡或道約清灣
起居雖未悉聲聞已難攀
明聖御八極震驚折羣奸
登賢彌制斷進士嚴刊刪
倒澤起游泳搜空集翻剝
斯時麟見郊絕世驥在閑
豈期脫布衣復得聯朝班
始疑迹異方卒見意俱閒
惟此冰雪壺近當雲霧闕
紀載竹帛藏潤色絲綸頒
儲才藏地閔抽思刮天慳
固當讓俊逸焉得委踈頑
物化豈堪玩仙栖庶可扳
寤寐在靈嶽傍徨愧塵寰
碧草蒙澗沚青霞冠雲鬢長

生願不負竟往事無艱常聞羽人言頗落俗士頑早伐
九節杖倚之聽潺湲

蒙恩供奉翰林未行改佐閩幕自豐城便道取
疾繇撫過盱與郡守薩侯會約尋麻源不果明
日別盱

暫遠雲霞觀却希山水音珠星聯極下璧月動江潯始
集寶氣亭復趨金晶岑馬飲樹連澗猿啼風滿林揚瀾
思汗漫睇嶺寫欽峯輟棹更垂釣推書時弄琴石門生

夕景麻源籠曉陰是邦遇賢守佳致契幽尋尊俎迫清
好絃歌彰古心郡中宜鳳集泓下或龍吟頗愧塵務逼
還為旅病侵一行混吏軌千載負國琛既往事莫究於
茲念方深姑山如有意遂許一登臨

上巳日文宣王廟陪祀畢歸西館作奉貽儒宮
諸同志

禮殿肅春薦齋居清曙鐘斜街星斗轉阿閣霧煙重久
去金華直暫依赤社封非才霑教育希世念遭逢文風

洩洩泗治日舒黃農深恩曷效報彞典幸追蹤粲粲金石列鏘鏘珂珮從飲福嬰多疾高卧對千峯

昨夜書懷將行且書且賦因成十二韻

鉅海截上國危星轉清昊去來抵二極俯仰適周晨往鵲無遺影潛魚有縱鱗勁風山葉碎濃露草根勻卓彼趙李輩鬱為唐宋臣忤恩非棄置知命有高屯妙句鏗金石荒臺蔓蒸薪憑高重回首懷古獨傷神記別玉堂夜來尋丹竈春常恐學仙侶亦猶辟世民蓬萊雖異隲

即此是通津

上牛頭石望海

人謂此石險我言茲境佳日兼山氣動雷與浪聲偕平
浦煙浩渺高林雨參差游魚依碧澗飛鳥却丹厓飲濁
逞孤坐乘危費亂排稍知舒磊砢初不近俳諧玄圃知
何許蓬萊在所懷將尋白雲侶高處結茅齋

重五日至西峽渡邂逅閩帥王侯盛稱山川之
壯余謂可以為知矣亦復有賦渡近方山之

下

繫馬西峽間朝曦射厓赤城中見方山江上成亂石緣
流感重險攬勢得鉅敵不有歌詠懷徒困馳驟役因之
竊歎欹美哉此嘆息尊醕清屢注槃荔朱新摘紛麗異
方俗卓犖同門客去去無久留薰風蕩南國

送樵隱侍親之濟南

春晚川陸靜日高風雨收斑衣隨授節畫鼓送行舟未
知會面期寧識離思憂崇旌殿歸鴈柔櫓答鳴鷗遠去

違四美幽尋考三周芰荷生歷下煙浪際吳頭設有來
魚使因之寄舊游

西巖夜宿懷雷州幕府同僚

月出萬籟靜岩宿紫煙深邂逅逢清景飄蕭澄素襟久
辭蓬萊苑復憶嵩高岑掃雪待白鵠凌霄看翠禽如何
較奇賞而此事幽尋雖負簡書畏還希金玉音涇暗泉
移澗風疎星滿林願持千里意空外寫瑤琴

奉同陳應舉月夜齋宿玉堂有賦五首

崇館肅玄閼虛扉敞彤碧詞林何蒼蒼國器皆奕奕顧
惟樸樸材謬忝文字後嘗僚負簡陋祇事深踧踖於焉
嚴明享况復在今夕

奉禮慙明信斂誠資宴歇風露洒九天星辰逼雙闕屏
聽非效聰規行殊改刑春容啓華萼宵影動林樾思君
空中雲惠我席間月

幅員施廣圖輪魄昭晬像三后猶照臨萬代極瞻仰寶
之在禁密本以肅靈爽豈伊呈苾芬遂爾通肝鬢洞洞

乎其忠洋洋如在上

塞直慕南董良明憲夔臯孰為非我事相命須其曹被
褐騫寒素奉璋參俊髦王戡載簡冊臣職放牲牢忠敬
道無二笑談誼彌高

燭暗曙鐘遠詩成春漏沉古苔見隱約幽檜響蕭森白
雪留寒色青雲延夙心在闕諒當補唯賢庶可欽願逐
西蟾影長栖丹鳳林

袁州謁韓祠已宜春臺晚眺

乘月泛修渚凌晨訪崇臺層甍匝地起疊觀凌雲開時
須炎夏首斗柄從南迴四州翠巘出六合清風來王明
猶日月憲令若風雷惠澤綠郊樹陳蹤蒼澗苔鼓鐘代
寂寞輪軫路徘徊聞茲守郡者自昔何雄哉百鳥見孤
鳳衆星嚴三台吏負鈞石寄法已豪分該云胡答臨眺
遠揖謝英才

八月十九日城東辟喧孤坐書懷

始生值高秋久客感流年睠茲琳宇閤瞰彼滄海壖霧

畜朝雨洩雲汎暑風還避人非絕俗淹病實妨賢昉膺
良辰會適使中情宣靜能驅百慮生已慕孤鶩焚香禮
碧草種玉思藍田焉得青鳥使馳歸王母邊

留贈黃明府

黃甫古傲吏而多清白心屈身試下位載道發清音洗
刷邑弊陋宣暢民滯淫荒村無吠犬秀隴有鳴禽淵明
不醉酒子賤自彈琴未必盡師古何曾暫渝今裁詩俯
碧澗煮藥玩虛岑清眠消白晝高視抵黃金我本江海

人常聯桑梓陰攜持粵山酒寤寐朔城砧鴻鵠歲月晚
鯤鯨煙浪深還為異鄉別舉手一沾襟

繇海昏入武寧道中

登高勢欲墜踰險心始領戒想適其恒經過何由騁洩
雲行崦杉雲落浥澗茗玄蟬振山淒皓鷺團沙整久盼
歸舟近况懷垂釣永豈不畏巖程無因攬流景煙霞蘊
至樂歲月啓深省百丈有幽期眷茲心耿耿

過梅尉祠下

梅尉清萬古許令騰八埏能官不必高高者廼其賢真
材儲世用遺蛻或如蟬嘗疑說者謬何獨今不然斯人
井竈處往往在林泉還丹誠可學但恐難為傳

七月初二夜洪州對月懷伯丈親舍

初秋公府肅明月到南軒開懷納清輝林影類溪園偶
得塵氣靜萬籟此中存物生感氣機候蟲噪四垣心虛
無所入起坐復何言猶云不如鴈飛逝抵高原

和廉將軍邨居二章

居止簡物競頗受歲月侵誠願輸崑崙遐舉遺浮沉時
冬萬物斂野迴景載陰雉鳴穡在場煙火邨巷深兒女
戲我前有酒聊自斟自斟何足貴得飲勝千金聖哲去
已遠六籍傳其心受生敢不受發憤攄長吟

念世居難終忘世亦易度今旦庭樹落空明見飛雨沉
痾從誰解采草時自炷萬里無一歸願得妙者悟寥寥
宇宙間舍此復奚慕

九日報熊敬輿

羸疾卧江滸承恩慰高秋木落鴈渚淨天朗氣暄柔便
了晨光中授我雙螭呼童敬薦之風味宜南州憶昔
客燕薊白雲從方舟於時見此物千錢三十頭打黃試
新羹爛醉天市樓一日食一百更為明旦謀三日困暴
下傳笑諸公侯此邦誠罕見初出愈難求矧當浮莫日
傾道俗如流厚價得兩螯持之比琳球物有少為貴感
事重綢繆奈何雷同者政復多優游欲折黃金花報君
向滄洲此花苦未發少待歲寒酬

贈安西王提舉別

車聲何軋軋我去亦翩翩
借問車中人幾時到秦川
秦疆數千里西與雲棧連
行人秣過馬猿啼上青天
長安古帝州宅土腴不偏
聞君答平昔宦游祇晏眠
十齡涉文史十五懷家羶
二十學壯游五十綴朝聯
奉常老掌故今已二十年
功業晚何就蕭蕭髮垂肩
天子念逢掖錫官頗靜便
紫衣綰墨綬此是車中綠
飄飄上都門白馬錦連乾
舉案招青山孟光老猶賢
大兒坐車軒小兒

調馬鞭中免又絕好國語荷珠圓旦夕俟君至買舍清
渭壩此皆足慰意日食官俸錢俸錢足養親親自有主
田人生慕富貴富貴翻受憐不有鐘鼎食亦無膏火煎
前日三市事目擊心凜然當時氣凌人不得呵烏鳶觀
君浩蕩去萬事當棄捐孔子不西行及河軌再旋今君
涉河流西路方綿綿終南與嵩華是中多神仙仙掌出
浮雲上有三峯蓮真人玉拄杖掛在明月弦便當往從
之吸月升太玄金鼎交龍虎使我神貌堅奈何二三月

百憂集離筵空花如錦機野色相交鮮楊柳亂愁思萼
條散青煙我不酌美酒敬讓故人先搥碎琥珀杯獨灑
春風前春風澹無言徒以別慮牽別亦無所慮所慮應
當宣願及相思時中腸鬱糾纏為吹雙紫燕銜書到君
邊矯矯蕭徵君珠具藏龍淵一別如列星隨天夜移躔
鳳有五色瑞時下岐山巔請君問起居歸來定何年

宿夏莊

陰晴知何如開戶月滿地主家種長榆竟夕薰風至半

生朝市蹤頗負山林意及茲登覽餘亦復纏世累棘籬
臨大道嘶馬駭童穉衆卧復離披躊躇獨無寐江山轉
寥落星斗亦連綴丈夫十載間豈獨鉛槧事

夏日奉酬汪使君

浮雲無時停浮雲有時停停雲在何方乃值初雨星我
亦毒炎伏歡言酒盈瓶解帶斟酌之醉已萬慮輕飄飄
翼長風便欲東南征林壑蓋青天上與霞霧爭安得徑
至此念之觸中情使君新詩來陳義富且精私慙應涉

淺如畜不充竊忘已量須進茲乃聖所營冰然內熱解
始識道非名

贈方永叔往教重慶路

汲水得明月倒影上青天客行三十年未識蜀月圓中
宵夢巴蜀秣馬辭燕服成都雖云遠未到意已足遠意
不可期宿夕宛見之雲迷飛鳥道雨急卧龍祠干戈何
草草祇說渝州好旦得渝州官甘就渝州老渝州古雄
城彭君舊建旌至今江石上猶有古時名豪傑世已矣

空城俯流水復有江東人來教渝州士方俟天機深大
雅托遺音沈潛萬夫敵脫略五湖心翩然別我往長揖
仙人掌疾風吹大旗落日明斜舫即此少相知相知無
限思巫山桂樹發折寄定何時

冬至日

冬陰已解剥天運旋其初晨興理書策盼望周太虛纖
雲無凝停旭景亦已舒未知太史家偵言復何如古來
聖明世不必徵其餘和氣乃致祥斯語端不踈大田黍

稻滋秋事在
蓄畬誓將理
歸櫟臨江卜
吾廬

天冠山

江東有天冠山翠鬱嵯峩浮嵐衍縣郭鳥啼若笙歌古
來有真人學仙雲岩阿丹成脫之去晞髮臨咸池年深
化為石石色切星河至今剛風吹梁柱不偏頗羽人室
其下厭見頂婆娑朝陽夏影縮秋月夜陰多吾欲勅五
丁掇之超滄波東掛扶桑枝此心諒匪他宏彼日月光
不可將如何天寒歲又晏雲露滴煙蘿

送吳真人持詔寧親

垂楊十二門旦旦羅鳴騶千騎萬騎中孰是違世儔美
哉吳夫子脫洒住丹丘氣涵羣象動思與萬物周天馬
出名駒逸態橫九州自從下地走但飲星河流明月落
中江倒影射斗牛飄然持玉節去犯蒼山稠紫鳳把細
華逶迤仙岩陬遂經三茅岑已登閣峯頭還家拜封君
玉冊珊瑚鈎笑問遊子衣不獨五色優門縣朱雀旂坐
擁金明裘開筵浥芳醴魚觴進庶羞承顏開淑訓慰爾

道路修爾歸奉天子萬歲更千秋
番君大國壽賀老清
湖愁煙水三萬頃
宮袍在扁舟
荷花合古渡
此處不夷
猶雲錦雙鴛鴦
悠悠戲汀洲
東風長年來
揚我闌檻幽
白馬絡金羈
奈此甚盛休
儂家閣峯下
霞竹敷稻疇
鶴集偃松雪
青雲互綢繆
自從干戈餘
川岳秋蕭颼
骨肉倚四海
風雲擾吟謳
聞君復此去
浩蕩懷今游
罷酒黃鸝鳴
高華艷城樓
良辰難能別
嘉會易為酬
至樂夫子行
子行無滯留

贈揭景哲茂才別

司揭本楚官子孫以官氏揭陽漢建侯氏實出於史同
源而異流流各昧其源泛舟在中河安得窮崐崙驅馬
燕山市路逢子揭子為我述其先本自司揭始及乎盱
徙洪著與揭陽通以茲究其源瀕海而南東南東煙濤
惡將身犯蛟鰐遠拜故侯墳遺蹤尚如昨歸來見翰林
贈以雙南金集賢亦敬嘆高文留賞音二公天下士
亦庭階美胡不攬家氈黃朱耀閭里九萬扶搖風相看

尚轉蓬高樓有橫笛送鴈上長空

贈李端朝別

驅馬別舊故舟楫麗城隅欲復少款叙子云不可須哀
笳激長雲羣飛滅霄衢孟冬猶溫風鄉此川途迂賢良
策上第再命出南區沉沉大藩府勤事以馳趨幸接江
湖歡豈期流次殊一朝遂西東何以慰踟躕高霞映列
嶽寧不眷名都解組翕清譽在德由豐輸要當給餘用
初終保瑾瑜

散步還南軒

幸自塵鞅絕起游欲何之江遠夕氣澄開軒納新詩莎
鷄振陽砌蠨蛸結陰池珊珊修木靜宛宛好風遲桃李
競秋園旋隨時草萎寧不悅生植肅殺乃其宜於斯見
發育及深霜露思嵇康本達節竟受薄俗嗤快哉東方
生嘲哈得吾師

市汊水驛候邑吏不至北亭書懷

端坐息萬慮於此道心存江沱歸鴈集楊柳落柴門刻

符期邑吏日晏已成昏相望不百里曾莫思崩奔以為
公家須緩急義所敦嘗抱慢令戒空復嬰憂煩藩羊蹂
嘉蔬頗傷主者恩雖非四鄰物祛除奚討論小橋通北
亭澗涸青煙繁未明復來日暫得辟塵喧塵喧不足辟
班馬在丘樊遠想高堂君逝將反中園

發富州

駑拙謬承乏巡游至茲邦登危始出幽歷覽見長江不
與夷曠會焉得壯心降力小而任重民憂正紛隴斯須

舉隱慝頽俗何由扛初下豐水船爽氣夕浮牕柔櫓奏
長風中流鳴鶴雙景晏川色淨岩際縣漁矸行止欽聖
則胡能守株椿

寄劉掾

往與魏盧亘談君在直廬會時春月和省事重跼踖聞
子大夫掾廉隅久猶初羈孤限馳驅不能枉尺書建康
古名都自昔帝王居陳迹今具在斯人定何如清吟足
度日羹飯可無魚勿論爵祿事於此自有餘廟堂議賢

寶匱美常安舒我我惠文冠四海將誰譽

嘉澤

嘉澤徧羣物山郭餘寒收日臨公館靜聊足散優游古
松含晚秀春桂吐新柔樹聲鳥語和苔逕蚓行周念彼
農畝士生涯托巖幽雖無豈弟賢亦免曠鰥憂而我委
素業布衣以遨遊謬通金閨籍一志旅荒陬還歸吏鄉
部胡寧心不休深承采菲意終負伐檀羞庭闈邇江外
何時泝扁舟誰能違天命且復盡人謀

度澤過關山

單車度大澤有似游梁山初飛鴈鶩徒辱在葭葦間季
冬陰風盛雨霰紛珊珊念我離大府行役何時還朝臨
昌邑浦夕指鄱陽灣衝泥赴農村老屋夜不關然薪設
供帳風味猶百蠻蒸烘濕衣裳徒御相回環極知道路
難尤念奔走艱傳餐建明燭饑渴未容慳春和理稅駕
且以慰衰顏

古干將

叟叟古干將經世不再見豐城匣已空龍亦久當變百
怪日夜出思爾一斷剗裝佩美紛紛不爾真百鍊又恐
百怪飛翻著他人身麒麟或失所魍魎氣益神不如且
深藏慎勿干星辰我歌干將行庶為君子陳

須句曲

朝望須句曲青桑被原野牛馬何茫茫盡在大堤下隄
高容可隱河水隄上流年去復年來青蒲送行舟借問
行舟裏誰是回鄉客燕趙與東吳憧憧競晨夕山中有

老人白髮不可量自不緣年壽何因爾許長

汧漳水有懷在京二三子

晨發宜姑渚迤邐汧黃流天清鉦鼓和櫓櫓隨川浮南
征卜利涉陽晷適三周野花明遠川時鳥詠芳洲麥苗
已含秀蘆笋亦吐柔一行被明命豈不職思憂時物已
具變未得吾行休眷眷二三子秉德聿宣猶密高諒能
淑大業非人謀惡乎報終令庶以答山丘

鵲來巢

靈鵲空中至，栖我庭樹枝。樹高不尋丈，下有弄丸兒。朝
騎庭樹拊，暮仰樹巢窺。寄巢欲生子，值此將焉為？是以
舍巢去，拮据忍如遺。青天覆上林，何息非所宜。物情非
有異，念亦顧其危。倘逢愛護者，鵲有復來時。鵲聲但報
喜，說似主人知。

盧鴻

在昔有志士，隱居嵩高峰。行義槩四海，矯若人中龍。天
子念治具，詔書訪孤蹤。既來亦竟往，去就何從容。架巖

結茅堂虛砌，蘼蕪封身。雖草土間道，為世所宗。攀磴采石華，引手接雲松。朗揖謝污瀆，長嘯紫煙重。不能諧聖君，豈徒愧萬鍾。安得起斯人，千載已相從。

和答楊茂才

始我南山居，與子共朝夕。服事子尊君，德義藹宿昔。焉知二十載，萬變如頃刻。漁釣負平生，浩蕩隨所適。進慙負官義，退愧尋幽迹。而此山水間，時勤問消息。夜深款巖扃，蘿月在屋翼。清言溢前聞，子學自有力。世好將未

忘相資庶有得

春鴈

磬磬九春鴈整列向天端
雖念洲渚幽已違霜雪寒
羣行旅陽土亦為稻梁難
啖食曾未充知時詎能安
銜蘆領孤雛蕭蕭理羽翰
明年還當賓勿興中路歎

范德機詩集卷一

欽定四庫全書

范德機詩集卷二

元 范梈 撰

五言古詩

韓山曲

韓山白雲下遙見翠竹祠其祠何代人云是宋君時里
中有周氏子孝母深慈所以樂慈母不吝千金資為母
築別館勾帶好園池母曰我暇日臨眺良歡怡夾山為
壽藏死汝葬於斯及死如母言攀恨無窮期即館奉母

容洒淚松栢枝至今空澗阿幽鳥鳴聲悲故老更為語
母訓猶父師子亡孫已貴孫復昌書詩紫衣腰黃金入
侍白玉墀間歲萬里至展省甚光儀流水莫自急浮雲
有餘思誰能和此曲為繼棘荆辭

二杏

甲寅

北鄰杏一株身作龍盤擎直上青天中虛空高結花南
鄰杏更好枝榦相交加三月二月時匝地堆紅霞自我
來京城寄居諸公家其地僻自阻茂樹繞牕紗亦有桃

與李盛節爭豪奢雖富無可人紛紛亂如麻晚遇此二
杏突兀超塵沙嘗時好客來立旆遙咨嗟欲去復顧戀
往往至日斜我昔詞館直羸馬道路賒晨往昏黑歸無
由領其嘉今我已投散終日猶枯槎朝暮出見之百匝
虛簷牙而我又將去何由報繁葩誓將適南郡辟地江
之涯種此一萬樹漫漫被荒遐花成實給食收拾歲盈
車此事亦易集但恐君疑誇

贈別白忻州

昔年上都門送君作太守今年太守來失喜狂欲走問
知郡中治稱冤不容口強欲對酒歌愁引杯去手古來
選郡監本為奸慝糾豈宜肆其私鍛鍊易妍醜幸逢賢
執法白日雲霧剖快馬歸并汾且以慰慈母失身洛州
縣茲事無不有君子善奉持凡百淑爾後排難與解紛
吾愧魯連友明年江之南得寄消息否

檢校菊吟

百華已爛漫虐雨更及晨疾風吹青空好日麗芳鄰自

知園居僻少與繁會親編籬種黃菊元不計秋春昨朝
新芽吐大葉已輪囷軒昂各有意未謂非其神故廬陵
雲下苦壤多荆榛孤芳久不見貫酒問遠人

雨後山莊圖

川容麗過雨百谷會新流溪路凌高轉佳木鳥鳴幽我
田橫岫下黍稷歲可收不謂有生意乃復見將秋時從
野老飲歡語載道周宇宙無終極此外更何求

道靈岩峽宿吳都人家

野飯寄峽寺重過已三秋雖若陟降險頗惟臨眺幽風
翻白練帶樹響黃栗留舊宅有主人無復識先猷向者
之名園老木陰相繆青山入坐席白水抱門流自傾鷄
黍載感古心悠悠

谷口散暑

谷口月未上漁火出橫塘門前面稻畦鼃黽襍風簞童
艸弄山墅今茲白髮長新歸稍結構日俟江海涼琴書
散衡宇藥物布滿床謝告未緣衰以疾不得將維時仲

夏半織女當西堂常恐梧樹落莎鷄戒衣裳平生荷未
志經歲失豐穰此行庶無負海內膺時康

登石城驛亭

南游未是謫北行不當歸今旦上崇岡飄飄風吹衣始
我在京時雙闕凝秋暉別來守窮海故國音書稀竊祿
滋媿負何時覩柴扉胡不依白石去即能如飛驛樓俯
平川其下白雲圍雨餘足稻梁可以信豐饑去去道路
遠王事毋稽違

饒國吳氏晚香堂

大江秋似練，楚樹落清曉。巖際不逢人，翩翩數歸鳥。
饒君庭宇靜，澗水黃花繞。爛錦照天朗，繁錢承露小。
何當鷓鴣鳴，誤識春事了。馬知歲寒姿，獨立西風表。
乾坤有清氣，欲少未易少。搖落暮春期，美人煙霧杳。

立秋日分司書懷

清晨鐘鼓鳴海角，金氣應芳樹。哀蛩歇凜節，亦已徵如。
何向亭午毒熱尚吹甌，是宜起居謬不與安養稱逝川。

無回波駕馬少返乘簪髮耻虛名丘園激高興飄飄百
年內過者已蹭蹬強學而有成庶以道自勝

將赴江浙大府校進士試會疾止建安驛上後

山東眺郡城作十二韻

青雲建安郡人物故鍾秀承旭開芳樹凌虛列遙岫溪
聲涌夜長石角吐秋瘦漁沙府圖識仙室川浸溜征塵
汨炎毒服事彌奔奏淡淡鴻鵠舉蒼蒼鷹隼候山英茗
在淪館飯菰登豆勤渠相國誼忝竊大夫後顧惟論賢

能奚取推寡陋吾欲勅五丁雷電激宇宙疾飛移萬壑
及此洗昏疚起為梅子真南屋掃丹白

送哈瑪爾廉訪使

有序見文類

龍節猗皇皇六轡忽如流聖主命大吏出按東南州東
南何所有榕荔蔽山丘深有險跋履淺有佳遨遊繡衣
闕庭戶法署若瀛洲提封憲令行霜日淨高秋公來天
為懽公去海生愁渺渺衆庶望為我少淹留郊亭接島
石楊柳蔭清溝鳥哢方覲睨花林復綢繆吾聞古君子

弗替進退憂昕朝正圖舊庶用慰忠謀

肇慶李知事會別至峽上阻風因以懷李

取別非云暮王事有程拘臨流逢執手復念野跼蹐李
秋北風急遙遙引方艫出峽江始放迢迢波浪敷仰天
覺形全俯地會心娛暫得珪組解樂與漁樵俱撫事悉
邂逅迴翔且須臾滿秩不受更竟行諒非愚

贈李兄提舉之官豫章

公孫閣下士多似魯諸生昨者聞高誼茲行起盛名文

亭南斗近征旆北風輕余亦懷鄉郡今猶滯帝城關河
驚半面霰雪念孤征芳宴絲簧咽新詩錦繡成長途心
果怯令節眼增明渺渺饑鷹度磬磬旅鵲鳴露凝秋浦
白雲散夕堂清是物關流動何階計合并會須紫桂檝
相共啜蓴羹徐孺亭前水因之幸寄聲

立春日和王翰林

北斗紅雲上西城皓雪邊歲華今若此宦味故依然節
躡荒冬後寒驅挾日先樓臺通帝極井落散人煙登眺

臨無際歡娛信有年客情關外地農事庾陰田只有傷
弦促那能效履穿幾時歸櫟社盡日接芳筵寶鼎昇平
瑞金旛淡蕩妍逶迤朱鳳集瀟洒白鷗眠遠業嗟何就
高名賴必傳道雖沾世用意漫逐時遷顧遇煩頻數欣
榮頗倍千江湖萬里興爛漫百花前

寄福建杜廉訪使君

臬府羣工表言官百世公君王咨稷契臺閣起黃龔吳
越聯閩服蠻夷偃漢風九州諸道右一柱衆流中虎豹

精神肅豺狼道路通青暝行勁銳白日貫精忠斧繡揚
秋隼泉阿達夜蛩壺冰元自潔瘴雨不勞空賤子嗟何
幸微心誓盡躬望來方切切告别匪匆匆祇為文科重
尤慙祖餞隆客魂銷海鵠病骨碎溪蟲謬敢辭王事私
嘗泣老翁髮緣思母白顏每應人紅倘使彛倫薄其如
祿養豐以茲三徑撫猶獲二天蒙幕府刑雖簡滄洲道
未窮請將心萬疊寫入嶧陽桐

贈翰林宅山水圖

敏絕丹青手驅馳翰墨場力能移地軸藝直破天荒素
壁清風起蒼厓旭日光喬林支混沌巨石偃滄浪鶴背
芙蓉影牛頭薜荔香參差殊不謬奔峭亦非常仙去遺
真館人來倚釣航向知萬里近不費一生忙擬乞丹砂
洞長尋碧草鄉松喬如可及結友更何方

奉觀百官迎香輿出南郊

聖治尊皇極天章達紫微禮宜崇報祀時則重瞻依吉
日初蠲策園丘肆太祈相君蒼玉珮卿士赤金圍高管

寒猶混清鞭。晝漸稀。合薌來北闕。敷隊出南畿。夜雪旣
旣過。晨煙陣陣飛。難叨惟帝澤。獨敬在天威。禮樂寧無
述。歌聲何有歸。從知堯德大。不外贊巍巍。

和謝友人惠范君用筆

毛君好伯仲。枉駕及東堂。盡縛曾無竿。尊亂反同行倍有

光。欲飛隨燕上。未化學龍藏。盛賜懷全璧。斯文託一芒。
姓名渾偶合。潤色奈何當。且效裁眉老。題詩西上陽。

詠古

五言在王國安所雕琢工肇及蘇李輩猶復相冲融往
還離別者人情之所同正聲始微茫與世狎汙隆遂令
天地產山川與雲風鬼神百物怪屈曲歸磨礪組繪麗
羣巧爭以為長雄雅道日以晦六義誰折衷後無述作
者仰止泣麟翁

贈別羅元友教授之應昌

翩翩郡博士騎馬涉長道居庸關門北仲夏綿茂草應
昌信殊僻宅近今豐鎬雖當清冽鄉足以消熱惱天家

振文治造士充國寶延攬必時髦如何戀芹藻驚風吹
過雨川水白浩浩但祝慎馳驅歸來顏色好

感興

龍駕迴層霄陰衝伏照光聖人一萬歲有道過虞唐我
與二三子羣珮爭翱翔玉京陳義問金匱發冥藏春容
麗藻繪晨色泣孤芳俾思候物媚沉思鬱難當願及西
北風馳之通建章

四月朔經楊林作詩奉命宣布郡縣值大水蠶

麥俱盡深念民生

吉日涉大川單舟若鴻毛
搖搖遇順風泛泛凌雄濤
已過赤岸渚復宿楊林臯
擢師何心術在險益無勞
受命未踰期觸目歎所遭
蠶熟麥再空萬口聲哀嗷
年時有災地白屋皆滔滔
不能補分寸奚用徵秋毫
綸言本溫厚下布肅官曹
奉宣吾職爾庶用救蕭騷

八月十五日公堂讌別作

悠悠我行邁去此粵山端
遲明駐征車爰盡公堂歡
開

筵俯城郭簫鼓集儀鸞謂欲戒醉飲重此良辰難關門
集會府僚友並征鞍更辭無別語但祝長加餐後者四
五人相從出林巒亦復路旁泣豈獨殊肺肝況我離慈
母朝暮偵平安送行各如許焉得不辛酸

秋日海康齋居

吟事久已落茲辰遇高秋泠泠空中籟襲我書帷幽如
何寒暑疾徑與大江流江流不復轉歲月已還周游子
去京華邈在天盡頭胡鴈不踰嶺眷眷非良謀排雲挹

飛觀金爵露光浮在遠心所仰胡為滯滄洲茅屋足草
花洵美難久留苟能一吾志斯道將何憂

懷丹丘奉寄元尚書

舉酒撫往日酒盡得離愁初謂歸心迫海天今已秋虎
豹守玉關宮殿天上頭青春白日和麟鳳俱來游廣成
攝四象安期扶九州下視汙濁世漂轉空煙浮仙人要
我來招我住丹丘豈非交不信景晏此淹留明日鼓桂
楫徑泛星河流高樓有長笛黃葉下滄洲

止酒

大鈞播羣物壤壤勞吾生得酒足痛飲何用身後名所以戒飲酒豈矯世俗情昨日足歡笑今日愁思盈多見桃李花語亂作棘荆反以飲召歡何以忘虧成靡穀漢詔切喪邦周誥明奚必宇宙內獨有屈子平

曉出西郊

自春已及夏歲籥寢中更平旦西郊道始聞啼鳥聲川晴樹氣嘉夕露枝條盈西峰近在眼白雲夾路生一從

違夙昔好懷鬱難并未知高世意忽復何以營屠狗與
漁釣俱足成大名卓哉箕穎客使我抱深誠

登西山頂還方澗作

弱質有貞向依依在物表謬當城闕隘放意窮昏曉晨
興理良轡啓途慮已悄白日滿澗阿林虛答鳴鳥幽尋
晚適遇頗覺知者擾俯仰古人迹達生未為少緬彼高
翔禽凌空自騫矯

秋江釣月

秋江明似鏡，月色靜更好。之子罷琴來，蘿逕初尚早。衆
峰更滅沒，橫笛隔幽島。我船爾櫂歌，絲綸蕩浮藻。潛魚
却寒餌，宿鴈起夜縞。離離不可招，白露下煙草。高風洞
庭士，俊業渭川老。同是釣魚人，那應不同道。把酒酬清
輝，如何答穹昊。

郡中即事十二韻

儋耳九州外，邈然在南荒。周回數千里，大海以為疆。古
來非人居，禽獸相伏藏。自從中世來，貢賦登明堂。其或

失撫馭山藪更陸梁聚則成蜂螳散即驅牛羊高結舞
大鹵上衣不備裳殺戮乃酬勸誅之仁者傷吾嘗七八
月持節泛滄浪一旬錄郡獄詢事考纖芒問之守郡人
莫識為治方但見西風多解宇秋蕪長聖哲戒忠信勿
謂不足行及茲蠻貊邦始見斯道臧

出甘蔗州

清雨氣候變移船孤石灘已行千里餘始驗初冬寒暫
解霧露毒稍知江山寬新人異言語故事同憂懼思昔

夏后氏封建天南端霸業起句踐世遠子孫殫無諸佐
大業遂作漢王官身受閩君策白日海澄瀾至今崇臺
上列戟絢衣冠古來樹名節於此事常難惟有精英在
青霄明羽翰

晚登南樓眺烏石九仙方山諸峰

自來閩中郡僑寓公宇偏身病縻服餌單居日如年憲
署歷三試愚庸寡所宣茲行臨辟道黽勉以周旋日夕
登高臺遙盼四山川山川亦云美宜與萬念捐慈闈隔

江關稚子目娟娟連夜夢新堂嬉戲在我前祿食無寸
補遠遊何當還東風號陰澤此土候氣先草木相衰榮
已復爭碧鮮思及方春時買船向邵延長歌蕩暄景吹
笛玉臺煙行止欽聖訓義著艮象篇此豈不在人虛心
以勉旃

四月八日訪閩粵王無諸古城遂至蓮花峰下
僧寺寺乃唐王審知祠

維夏氣清晏原藪樹龍蔥上弦適休暇游詠紫煙中石

澗演新流山苗含惠風肥苧膚隱白崇榴葉張紅撫節
驚代謝未歸憂心忡承官尠政術但覺祿養豐句稽困
日月始得治游驄觀看職何補庶望禪至公遺丘隱莎
草廢刹在空濛而况塵境事斯理固有終

數日毒熱喜雨適立秋先三日也

夏末始炎毒沉憂坐匡牀起行無所之登高睇遐荒問
昔西風歸颿颿向何方往還不可期賴得天道常聖主
御大厯故可稽明堂粲粲白駱駝茲晨郊路長念我伏

遷次江海葉再黃旅懷抱焦火思濯寒冰鄉忽來浮蒼
雨爽氣吹衣裳稻田已就穫晚種待新秧微軀亦易持
但願烝黎康

新雨堦除花藥倍茂田里生意懷之欣然情至
有述簡諸作

久旱埃霧集閒居寡高情微雨夜來至滿庭花藥生長
年憂里術退坐若無營偶攜一榼酒得喚故人傾念彼
忙隸便勞生在耦耕存饑苟不熟何以供王程幸天沛

時澤食息日已寧
繕性衡門下寒饑無足驚

苦熱懷楚下

苦熱不可極
念此西南風
誰云灝氣遠
乃在庭戶中
我家百丈下
井上雙梧桐
向夕集歸鳥
未秋足鳴蛩
自從別家來
江海信不通
宛宛維桑思
願從孤征鴻
夜夢白髮親
歡笑攜稚僮
倚門望子歸
未歸憂忡忡
東臯無良田
何以待歲豐
盛年將稱意
無為學轉蓬

觀錢塘上人墨蘭二首

蘭以比君子所貴者幽深黯然空谷中遠為人所欽志
士秉美德如玉復如金篤實而輝光芳華出喬林偶然
為時出節義凜森森下慙烝庶望上當君主心功成無
所累宿好在雲岑

翰墨者誰子妙年出江關翦鬚事浮屠游戲在雲山時
將騷臣意寫入尺素間嗟彼為形士長往不知還其心
猶有慕豈不薄茅管學古寧為人誠念修己艱聖哲雖
異代詎云不可攀

明月幾回滿

明月幾回滿待君君未歸中庭步芳草蝴蝶上人衣誰
念同袍者閒居與願違

蒼山感秋

蒼山秋意長池館靜而悶雨止修竹間流螢夜深至皇
羲世云遠雅頌日凋弊舉手遏頽波誰識作者志烏啼
魯東門泗水不染袂後去三十年直可肩聖知機關繫
風化詞語特細事月落閉虛簾坐夢太古帝揚眉潤玉

色盡發養生祕勿謂仙學難此道可立致

酬申屠子迪

碧月出海底挂在青天中美人如明珠滄波思無窮身
非千歲客欲逐萬里風願因紈素衣託向孤征鴻

筠州東都遇雨

高林展夏綠杲日轉城岡四國金石流忽見飛雨涼飄
飄西北風亦復至我傍我行初涉旬去意已傍徨親交
苦滯留川陸訝阻長遠行雖有命期至詎能忘宵分睇

南星命僕戒川航豈無他方願且反顧舊鄉舊鄉寧非
懷吾生未渠央

贈宣掾蒲瑛還靜虛山房

掃地謝塵鞅坐誦聖賢書妙年陟府署服食猶休居聞
子進修地花藥羅齋廬惟靜故能定有容當在虛而虛
乃非空養之貴安舒苟能充至理德業將有餘子本西
蜀珍西南散簪裾問知其方俗有若鄰華胥教化本自
然匪學故有初況彼聲教敷封疆常晏如清秋武昌郊


氛霧夕開除誰能不重別執手以踟躕

遠遊

遠遊非吾志偶墮天一角去就亦有期寧能計今昨料
理貧居士守書負西郭清心見古初德宅甘寂寞杜門
坐春深綠竹解寒籜雖無清時賞幽意各有託千載非
長生松喬未足學焉知勾漏令不厭宦情薄山中歸去
采朝霞可以酌

述古

天下有大垣人自隱多岐任理忘恩怨何乃累吾私元
氣育萬物雨露豐悴之豐悴雖有恒還復係其資強者
固弗已弱者自有期向者橐籥中竟是誰設施美哉唐
虞聖至治以無為



范德機詩集卷二

欽定四庫全書

集部

范德機詩集卷三

詳校官庶吉士臣初喬齡

侍讀臣孫球覆勘

總校官編修臣王燕緒

校對官助教臣羅萬選

謄錄監生臣李觀光

欽定四庫全書

范德機詩集卷三

元 范梈 撰

五言絕句

題張果老騎驢圖

細柳官橋路騎驢不用鞭先生誠有道此去亦千年

題竹樹圖

老樹半垂葉疎篁斜露根若無煙霧隔應見石西村

秋江

秋生洲渚靜露下蒲荷晚忽憶釣魚時人家楚鄉遠

建昌小湖望廬阜二首

青雲覆疊巘白鳥度平湖釣嶼夜來雨山深知有無
我懷貞鍊士多在巖谷陰惟有高林月長知望遠心

題二仙圖

明月萬山空溪橋暗路通不知何洞府終夕坐松風
絕句

障擁芙蓉競燈隨檉柳移繁星臨迴野疎雨過高池

江上打魚船有頭那無尾與卿相見時不望如魚水
鄉路西州是延平那向東片帆儂會使祇是怕隨風
水清灘自急蕩槳直須人勸卿休恨水多為不知津
水如青銅鏡山色綠芙蓉中天明月上此處好相逢

看東亭新笋

問竹何年有親曾共歲寒昨傳新笋發扶杖繞林看

送別

為君垂別淚更向楊花側斗酒問離鴻幾時歸故國

燭夜

燭影夜侵牆松桂成行列鼓絕草蟲鳴四山露華結

秋江圖

雲裏衡陽鴈網下武昌魚石門秋共遠江樹雨餘疎

芙蓉

芙蓉生石壁雲錦映青松那憶南州路歸船處處逢

五言律詩

蘄州城下晚泊與土人語及西方事平有喜而

作

野濶秋無際
天空夕始涼
漁船下浦急
畚火入雲長
洲遠懷鸚鵡
山危指鳳凰
戍人新斂甲
垂老幸時康

黃州道中

徑轉山仍掩
沙移圃自成
蒹葭連水白
楊柳蔭門清
無復論餘事
真堪了此生
眼中陳仲子
九鼎一毫輕

贈孫秀才

四海孫思邈
雲仍復盛名
白駒空谷遠
黃鶴大江明
子

去何瀟洒人知盡老成特來容貴近次第取公卿

舍前龍骨樹

隲夷籬落見誰種此江津結幹多於葉成陰迴不塵取
材因惡刺感事撫長身安得艱難際相從作四鄰

百丈山中夜坐聞謹思將還憶甲寅入南中正
此日也十二月二十三日六首

近得雷州信遙知弟姪來江山淹遠望天地保疏材鄉
為魚羹起今寧馬豆猜殘年有心事未定著寒灰

欲雪翻成雨何天恰吝晴似綠春在近故與月爭明
谷樹行行暝川雲冉冉輕往年當此夕孤棹適南征
歲月嗟匏繫乾坤信梗浮蹉跎逐越鳥迂濶問吳牛
正道曾無弊旁觀各有由聖人如可起吾欲詰東周

飲谷驚風合空階墜溜鳴燈昏時作暈漏遠不傳更
但得林間趣何須谷口名是誰超物外不用計浮生
往備清華職寧知濩落心槐街春日盛杏省午煙深
出試終何補還歸敢自任祇慙山澤吏空受二毛侵

客行身萬里家在地中分爵命優臣子江湖遠聖君夜
瞻龍鳳氣歲出虎狼羣舊故無消息低回瘴海雲

壬戌秋錄囚晚行寧州道中追錄

曉發高平鎮前旌路未分小橋煙外過流水月中聞虎
豹宜多隱豺狼不可羣居人敵炎暑報有竹連雲

寄題嚴氏樊川別墅二首

先生天下士小隱郭東村甃水緣開逕楹山對掩門士
風寧近洛川姓不離樊樽俎心雖間衣冠口已喧

亦欲西流去相尋素滙邊多應百年術少見一人傳生
事空芝朮心期托蕙荃明當詢大藥畏子不論錢

數日跋涉泥淖至北山始霽暮經鄱陽湖

川路遶長林歲窮千里心賈舟栖港迤樵火出邨深欲
雪應消瘴因風忽解陰轉移足清景難受客愁侵

寄謝董蘭卿

高人北海下遂與世情疎悵望九霄鶴攜持千里魚風
雲今邇只泉石後何如詔讀須中秘無疑未見書

步畦

老去閒中好
清晨步菜畦
祇言無所事
寧復有相攜
日靜聞禽語
泥融散馬蹄
讀書不解俗
猶自負幽栖

引免灣晚泊

席壓波心正
舟移岸脚斜
夕陽明細霧
秋樹擁荒葭
問道獨如夢
懷京却勝家
客愁不自整
更苦暮啼鴉

秋雨寓舍酬答夏編修四首

亂竹通鄰舍
修梧限掖垣
日長惟有雨
秋半祇如昏
野

色愁俱破河流畏更渾惟應好僚友孤寂義彌敦

左丞京下宅大半貯蛩螢容曳栖烏地低迷卧鹿塲幾
時衣定暑昨夜酒生涼太息時人語依稀不可忘

平生談笑口未是向人慳直以朋友內難為伯仲間陳
君元下榻賀老自懷山見謂前修事因之一破顏

倚巖推許遜負水揖文簫萬里初隣並長年此寂寥不
要麟閣畫虛累鶴書招同是西江客君當結夢樵

九月十四日過紫極宮熊道人房

層軒俯江竹歌枕對連山雨止煙霞集洲迴鷗鷺間紫
霄行有逕白日戶無關但見空中侶飄飄不可攀

九日諸生攜酒至城東看菊

楚楚臨堦菊重陽特地開慰人良有意報汝愧無才巷
杵聞雞發隣觴送蟹來采英吾欲寄悵望倚江臺

閱除目仲淵宣慰傳之廉副俱出山南暑夕有
懷無由傾倒

舍下初秋至明月出雲端清輝延細竹爽氣集幽蘭江

漢不容越方舟逝良難瑤琴誰起坐中宵為我彈

題山居圖

平湖含白水斷岸見青林籬落初秋氣雲山向夕陰
養閒祇用拙避俗更懷深為問舟中客何如澤畔吟

社前七日作

久早春始雪社寒猶未妨沈沈鶯待木語語燕歸梁
靜想親交絕儀求旅處臧以身觀萬物應繁末輝光

奉訊浦編修

聞君踐馬厄詩賦日應多但倚文為命焉知病是魔蒲
萄深巷雨齒莖遠湖波未始無相憶經過奈禮何

送譚殷卿歸徽州

送君從此發何日到徽城已是夕螢亂况堪秋鴈鳴行
藏無定策仕養最關情見誦覃懷守名家舊有聲

題贈李右丞

恂恂李右轄行義古人期緩急倉公傳勤勞衛母詩滄
波大地轉白首老天知莫寫青田鶴鳴臯重我思

晚過孔奉常舍下

滄江一萬里書信近如何向暮客懷薄及秋鄉夢多故人相慰藉並舍數經過但願長無事彤庭接珮珂

悼遠用友人韻

米江莫采蘋思食莫思尊間歲曾為客經時獨夢人林園花動夕帷帳草留春萬里燕山路空懷涕泗頻

酬孔太祝

蘇郎懷印綬不計敝貂裘一去青山下三年白露秋關

心悲地隔涉患見天游笳管深無那晚來動戍樓

贈別朱生為南海醫教得問字

拜命辭中闕鳴簫下南郡天晴木葉空江暖梅香近解
鐸風成陣開堂月生暈欲酹扶胥碑移船定相問

贈別李教授亭赴五羊先往餘饒覲省

行色動西風鄉心去住同諸生五嶺外之子大江東且
羨還家鶴無愁度海鴻若逢天上使書記莫匆匆

贈別徐教授之欽州二首

徐子雅好易白頭來上京如何懷遠檄竟往教專城山
近煙霞密江澄瘴癘清朋游政事少況在仰修名
冉冉歲月暮悠悠關塞長歌鐘凝旅宴舞袖拂征艎到
日梅花亂來春蕙草芳南金自昔重寄贈可能忘

移居東城

移居古城喬桑竹似村墟已謂丹霞近無嫌白日疏天
晴時見鶴池淺尚通魚賴有知心者過門亦下車

十二月五日雪答傅淵道

薊門臘月雪初似楚南寒祇悅年光盛寧愁旅宿單濡
毫思謝朓掩戶憶袁安昨暮瀛洲署應當策馬看

王繼學晚過舍下翌日惠詩兩章用韻答貺

平生病太史淺陋愧曹邦自足封函谷聊須壘受降黃
鍾知和寡白壁動成雙天外誰招得清風滿八牕

客居惟所適不是遠時人聞喜池臺僻來依第宅新月
涵鐘警夕風引釀生春頗得過從樂相看莫厭頻

和二章已而徵者適至戲用韻為再疊云

久客歲云暮悠悠念異邦
病因詩暫愈愁為酒先降屋
隱疎簷半城依老樹雙晨朝
有好鳥命我隔東牕
頗怪君家使徵求太迫人
從知心匠苦况復物華新輟
夢天開夜思歸水墅春縱無
青玉案寄贈莫辭頻

用韻報李宗明

李侯持重器隱若一雄邦
敵至嬰城守威行走傳降薰
絃須和五古劍肯埋雙見說
研朱地車聲繞碧牕

古來輦轂下不畜隱淪人
况有龍門舊寧無獸錦新江

山政如畫松栢自宜春可是東城曲過從步屨頻

送張月梅

卧病空山裏君來起素秋叩門驚遠字扶杖揖清流
潦倒炊梁客從容樹橘侯偶同螢夜語行李又何州

三月二十三日雨中示諸生

後園僧寺裏聞有蜀葵花好趁今朝雨移來向我家
編籬雖待菊引蔓盍藏瓜總在經營力秋成莫浪誇

贈別李太祝還廣平省親

六祝周遺禮千官漢盛儀聲名無此達少壯任君為孤
戍程雖迫萱堂拜恐遲都門四月別愁殺萬黃鸝

贈答吳二奉禮

新詩走風雨感謝老兵來藥圃昏長樹柴門靜古苔妬
晴鳩狎喚怯冷燕頻回解說銷愁事何由斷酒杯

登南城樓

樓倚晴空外登臨延賞心微風孤鴈過落日萬蟬吟客
路侵齊樹鄉愁接楚砧為詢宮外筑流水似哀琴

寒食後百丈山夜坐

已新寒食火更近暮天鐘花片隨風減柴扉帶月重以閒酬宦達將病抵心慵本不從耕稼臨江愧老農

月出

清楓起夕陰明月出高岑達識衰榮理深齊去住心夏蟲先振砌昏鶴未休林不有詢奇字應誰載酒尋

山壽生日

見爾開三歲堪余謝一官常憐為子重更念報君難曷

日勝裘馬於天學鳳鸞終當慰老眼空闊萬人看

九月二十八日濟上作

昨日立冬雨內河中夜雷晨興猶未定震懼忽如摧衰
柳並寒在早梅何處開饑年方禁釀不飲稱無才

快閣延望

快閣延江望清尊息坐彈風鷄猶戒曙雪鴈每辭寒莫
使晨歌廢聊思飽食安百年會有故終不愧儒冠

題秋山圖

我愛秋景好自緣秋氣清江空石露骨木落風無聲偶
向畫中見猶如雲外行祇疑豺與虎無地得縱橫

正月三日大雪

大雪生何處飛來應早春清寒微著物光霽亦宜人日
月雙吟鬢乾坤獨病身濁醪差可近祇為有天真

康大監善慶堂

大府聲名舊京華有此堂棟梁深盡制花竹淨分行世
美尤當濟身名賴必揚自公常退食把易細焚香

九日和危太樸見貽

年年江海上飲菊對重陽又復茲辰至都無少日狂遙
峰栖戶碧敗葉擁池黃只有長生事於今墮渺茫

九日簡危太樸

疾風吹細雨忽忽過陰厓久喜江山靜新增節序佳秋
聲連迴野暝色起高齋自得論文侶中年有好懷

夏夜登後亭

縣酌羣山置亭因古堞安幸無多檢校於以小盤桓潦

倒淵明釀淒涼子賤彈杖藜聽夜鶴世慮苦無端

湖上值雪

農事傷下澤官曹限窮年崎嶇盡所歷繾綣何由宣
明變松雪室冷延山煙少歲守恬淡未敢輕棄捐

貴州

離思久不愜幽情晚旋添天宜明月獨山與宿雲兼
語通支柱蛛絲映卷簾若無光霽在何以破朱炎

發橫浦之永淳縣

急漿開晨漲孤尊已夕陽木光排峽靜洲勢背城長太
史才無敵將軍義不忘感傷今歲月淹泊愧滄浪

寄劉傳之

故人去南海已度百花時萬事須重到孤舟何太遲雲
迷帝子渚月過伏波祠幕府文書省來須慰我思

晚至沙塘

風雨病屢涉煙山知幾重平湖畚近服大邑艾遺封受
粟常慙史看花正閔農周原已遍度明旦復何從

三月十一日遣家人還舍奉侍值雨十四日值

晴作

具船聞解纜想象係朝昏到日初收雨沿流定達邨初
生南澗藻好近北堂萱載感飄零意清江是故園

古木

誰擘蒼煙破依稀露老龍偶違風雨會遂感雪霜蹤飛
動闕元氣沉潛見物宗何階韋偃伎千歲此相逢

贈別韓德卿歸安西因候蕭司成

十年關隴道文學老貂裘久別重相見相看更自愁
早膺朱紱寵暫為白雲留寄謝蕭夫子巖栖向幾秋

寄宿維揚驛寄懷王儀伯

水墅見明月適隨歸棹圓故人在郡國今夜隔風煙
何日徵河內常時誦潁川經過因念此書信賴流傳

題靖節徵士歸來圖

維公楚杞梓作令晉衣冠得志但恐暮濟時非所難
古今絃韻寡歲月酒杯寬渺渺山中去深深畫裏看

題吳生雨吟圖還寄清江皮野

江雨四時昏故人家遠邨如何一見面還又兩忘言老
樹經蛟淚空花斷鴈魂由來前日畫妙手出吳門

東齋秋雨後花藥具有生意

田園雖尚遠未肯效淒涼藥就籬成蔓花因逕作行豈
惟延晚趣自足信年芳頗敬鄰人婦驅鷄不過墻

病中

世故只如此予生今若何不憂新食少但喜好詩多野

鶴來濠上山猿落澗阿平時朝夕者經歲不吾過

哀文集賢時奉使南海道弃

瘴海距天關道踰千萬山空傳靈雨送不見使星還旌
旆青楓暗樓臺白水間郡人惟我最遠客泪潺潺

贈葛推官

五罰從容至羣生阨塞多但無為已甚勿問達如何早
讀于公戒終傳召父歌故人風雨節為我數經過

張別駕山居產玉芝

高秋別駕宅異草吐奇芬為爾掇白雪服之乘紫雲但
恐仙靈物長遮虎豹羣待棄人間事先報赤松君

贈別李全

士以才名重君猶梗槩先間關百年道浩蕩九春天不
為歌彈缺還尋與酒錢古來自如此相問澗西田

奉寄高郵李使君

題詩報使君奉達楚江濱剩水龜鼉窟低空鴈鷺羣朱
旂臨野日翠袖繞山雲早晚金鸞召風流許細分

晚興

古寺山重掩平田縣對門
鷓鴣藏白晝蟋蟀破黃昏
貝賈多通市諸偷每近邨
殷勤省風俗慷慨動心魂

澄邁縣有蘇內翰所題通潮閣在海上

候館駐征騎西風獨夜清
開門聞葉落倚杖看潮生
有禮齊蠻俗無歌學楚聲
淒涼蘇季子行處足高名

將行值暴漲

雨發蠻山漲來從五指原
風橋初沒馬到縣已侵門
甚

欲乘槎去還思弃佩言輕身犯南斗信有北溟鯤

詠荔子

思歸江路永荔子幾時丹祇念違親久何嫌待爾難園
林有專美霜雪莫留寒記得珠厓道長吟立馬看

細雨

細雨沾牆竹輕風發檻桃幕分流水靜樓抗遠山高但
長琴書癖寧知案牘勞趨朝未覺懶興味屬吾曹

和謝梁內舍過訪

承聞招隱處獨占萬山清乍見心如醉多憂眼遽明薦
遺唐四岳道付魯諸生欲理尋幽事唯妨夜鶴鳴

河口

神女大河口逸人陰洞中船鳴谷雨浪門掩荔枝風鶴
鶴行相背烏鷗宿自同為於百年內試問鹿皮翁

晨至西郭池亭見新荷有感時物而作

虛亭結構美驛路帶垣斜山鄉含晚翠池響集春蛙官
荷已偃蓋僧蔬欲架花俯仰賓從役孰與測幽遐

三山對月懷山壽

豫章千里月漸解向天高安得山兒慧能知海客勞榕
城咽韻鼓竹館淨香醪何日書帷下清輝映鳳毛

晚上南山觀燒

渡口向寥閔夕暉生翠屏隨風初繞電翳霧忽如星鳥
獸蒸宜遯柴荆照不扃閩都春始過雨洗合重青

庭草

爲愛庭中草經春坐不除澄心皆淨域履道即安居海

氣含樓閣年光映簿書昔人傷廢事作吏竟何如

昨游

昨游居士澗春入羽人丘面面山相引年年水自流
乾坤雙蠟屐江海一漁舟知我能來否啼鶯去復留

雪觀雨後對薛老峰

高閣飛雨過新涼連海隅竹溪魚板集松寺鶴巢孤
吏隱非兼得登臨適自娛盛名蘇季子猶是老征夫

京下思歸

黃落薊門秋飄飄在遠游不眠聞戍鼓多病憶歸舟
甘雨從昏過繁星達曙流鄉逢徐孺子萬口薄南州

延平西峽

巨浪劈山傾孤舟與浪爭逆飛天地肅掇出鬼神驚
至險追前載終身願太平不然忠孝理值此各何情

次韻曾五判官

磊落將軍石周游太史遷世人寧見爾我輩故超然
膽急投豺地神銷過鵲天祇今誰可語壯志必同年

贈顛叟僧別二首

問子家何在名山越樹春來遊萬里道去作五臺賓乞
食寧忘祿行歌若有神曾逢陸脩靜招入社中人
未是真顛者能顛故有餘試留吳郡草為報揭陽書帶
日辭銅馬投雲聽木魚南歸定何日白象守林廬

送施處士還東溪

東溪子故物歸去一身輕樹曉雛鶯坐沙晴乳鹿行乘
舟不盡興罷釣忽忘名憶我南山下靡蕪繞舍生

期出東郊不果却率便河閘橋詣張道人菴尋
故舊作

却欲東郊去還尋北渚來江翻垂木動風過襍花迴
道迷朱轂虛空見紫臺世氛渾不奈憶得是蓬萊

閱友人壁間詠有懷舊游

漫說經行處雲邊第二春石林投倦客畫壁跋高人迹
與風鵬轉心兼野鶴親平生許玄度自比白頭新

和李溉之園居集咏八首

書劍上青霄鄉關雨雪遙年華侵水竹客思墮山苗會
想商巖綺將從鄭里僑文辭誠小技祇比俗情饒

豈是幽棲地飛騰亦未量城根分鼠壤池面合魚梁名
久喧郎署歌時感女桑畏鄉音調苦疇復貴相忘

圃色依簾障天光切戶庭草生連夜雨花落遍池星未
遂翔寥廓真堪託晦冥逢時須紫燕得意拂青萍

亦欲依家耳衡門斗極邊鄉心徵化鶴宦逕跼飛鳶白
日拋書送青山拂檻延風流自無已憶上五湖船

都無京國意滿眼舊生涯壁隱崆峒木檀蒙婀娜花善
隣垣故關愛客酒能賒皦皦荒途子音期只爾遐

偶從耕鑿事便有古人風井瀉千畦碧林然獨杏紅世
情何近遠宦秩自卑崇任道流行意零壇或與同

磊落人間士名成定不虛願陳元有策交薦可無書莫
遣從師苦因將作吏疏吾徒豈念此媿盡馬相如

丹柰花初結朱櫻子半成寢興因物變筋力與年增燕
拂承塵去蜂隨曳杖行玉泉幾千仞好在翠如傾

重過太傅忠憲王園林

一代王章寵於今勝地非野池花自發春日燕爭飛坐
送笙歌密衙迎劔佩稀頗索遊子騎脩景澹忘歸

登覺山寺

遠見浮圖頂逡巡及寺門此行如有待何地更無喧山
背斜陽惡泉侵落葉渾沈沈委臺殿多是賜金旂

種瓠二首

或言種瓠蔓長必翦其標乃實予齋所種因

樹為架蔓緣不已果多虛花欲去之慮傷其
凌霄之意因賦五言為之解嘲云

豈是階庭物支離亦自奇已殊凡草蔓綴得好花枝帶
雨寧無實凌霄必有為啾啾羣鳥雀從汝踏多時

秋後瓠果成一實輪囷可愛予嘉其晚成而
不羣答賦云

嘉瓠吾所愛孤高更可人不虛種植意終繫發生神有
葉誠藏用無容豈識真明年應見汝衆子亦輪囷

六月菊

蕭然故可愛況在五侯家未到三秋節先開萬點花風
霜寧未熟歲月自云賒慙愧青松幹昂藏照島沙

戲簡孔太祝

人間最好日祇在菊花前頗怪來今雨相看語後天門
階銷俗客冠佩切飛仙願約秋風住長年泛酒船

送劉修撰赴湖南提舉任

久淹詞館寄新奉璽書還白髮臨漳水青雲動楚山文

稱一道重政類百司間設有湘南騎因之解別顏

寄李彥謙

古燕城下路柳樹落西枝每到重來處長憐欲別時鵲
飛平照急鷗集遠煙遲此去秦州什應須寄我知

寒齋對雨書懷

冬煖久不雪天分雨破顏依稀纔洒戶慘淡欲連山垣
屋重重密壺尊獨獨慳焉知魏闕士隱與吏相關

客至

客至冠纓好殊非舊友生曉晴霜太重冬煖日偏明覺
我肌膚弱興言感慨并子雲工賦述切莫論公卿

詠梅和陳城南

我亦吳頭客年年念遠梅孤根元自植冷蓋為誰開因
觀城南詠深思嶺表來北人盆裏看應不近蒼苔

守歲詠懷次韻

大年在今夕旅爵記前除時序無閒事江湖少定居燭
花分坐委漏箭落城疎底復窮廬嘆人生各有初

送貢仲實還江西

送行何太頻日日見行人又復風霜節相違旅病身浮
名非甚急遠意獨難信念子關勞苦題詩莫待春

題友人山居

游居展靜好盡日有高情竹下流泉過花間時鳥鳴因
人問藥裹要我罷琴迎本自無知者山林頗近名

林尊師招不果就別

甚欲摳衣去仍煩折簡呼竟孤林下約還想市間壺野

館侵濃樹春波亂嫩蕪看雲解榻意秋露近玄都

野望

思遠卑棲地憑高獨望辰峽雲低度晚野水淨含春語
鶴關梁迴歸鴻歲月新不堪回首處橫笛倍傷神

游招提

勝地相從日應無俗客蹤春花濃夾騎畫樹靜藏鐘妙
理端深得佳游亦漫逢憐渠絲與竹舫上見西峰

送白湛作尉金溪

離思已無極尊前況夕曛閉門六月雨行李萬重雲遠
祿年雖壯名家代不羣縣人迎主簿應似大浮君

盧師東谷懷城中諸友

契濶遽如許淹留空復情天遙一鶴上山合百蟲鳴異
路嗟何適冥栖得此生平居二三子今夜隔重城

送鄧慶長術從宦吳中

聞說吳中郡青山萬疊開雲霞通井邑水木映樓臺子
去嗟何恨吾生念却迴辛勤官下養書記合頻來

正月三日海子泛舟

曉日明如茜春波凝不流
浴鳧浮斷梗過鴈折危樓
頗敬吳兒狎何傷楚客囚
沙邊繫小楫初慰玉京遊

送雲知事赴餘杭

一舸發春瀨涓涓沙鷺明
官煩南郡佐禮重北城迎
海浦潮聲暗山城日氣清
宗卿懷故掾蚤晚薦高名

暑夕

煩暑不能寐望鄉憶宵征
開門海月白高枕林風清
不

飲畏投轄將歌思濯纓誰家橫短笛吹盡楚關情

七夕詞

天上新秋節人間巧夕祠不成兒女笑空負歲時悲
璧月當軒墮銀河帶闕垂低頭愧烏鵲寧為遶南枝

和巽初得子

喜事平安使家書遠見貽正愁行路子新得稱家兒
白璧無勞羨青雲日與期庭階人事意眼冷念含飴

離席合賦贈南劔教授盛復之之官凡十首

盛君江海士直氣軋霄崢翻為詩書苦焉知印綬榮度
遼曾萬里走越更千城便是來難得鄉關近慰情

首路向朱夏出關猶到官麥收風漲暑梅熟雨留寒氣
候隨方異才名自古難豈容賢若爾教授老江干

江浦見黃鸝石榴花滿枝欲攀猶屢惜已去復何疑蚤
畏紅英亂還當絳帳移驛程動易隔留待寄相思

娟娟沙尾鶴毛羽映江鮮去住長如此飛鳴豈偶然仙
家應汗漫侯判莫留連憶得東門事須君正壯年

閩南荔子熟問客倘能來暫為諸生屈寧傷獨茂才雲
飛絕寒落雨過行平臺賦就新詩別扁舟且莫催

昔向遼東郡長歌覓管寧此行無贈策故事有談經豆
實登朱荔虹光照紫萍龜山文物在未用嘆凋零

躍馬問入郭解龜聽報衙江沙侵細竹牆蔓覆疎花政
不離書閣吟應上釣槎有懷當皓月玉署聽啼鴉

碧草津頭郡雖偏是勝遊野人頻識劍穉子亦能舟稍
定傳衣怪聊資宦秩周南來說風物有待細詢求

杯酒莫停手路長思八閩精靈深狎客瘴霧薄侵人海
近漁船集山空鳥道隣來京書一束賴爾老隨身
黃帽催晨發郵籤報旅程朔風斜帽舉虛日亂弦鳴異
俗從誰變真才不自成倘於高第內歲久得歐生

奉寄淮東憲孔知事二首

日有烏臺使因君問合肥熊章官下食虎略幕中威易
政聽時報交深念日遲知音階上列須假繡為衣

昔在東門別相離數歲星一官何委折萬里獨飄零楚

樹春頻落燕雲晚自停幾時淮浦月仍與共揚舲

遣懷

柳影侵門暗桃枝亞竹高年深詩並進春在酒爭豪吏
隱嗟何擇行藏信所遭斯文如未喪端合付吾曹

范德機詩集卷三